

Segun Tico Croes: *Gobierno falta division y agresividad den turismo*

ORANJESTAD(AAN) -- Tico Croes di AVP, a reacciona ariba declaracion di Ministro Briesen.

Tico Croes ta lamenta cu Ministro Briesen a reacciona di e forma ey ariba e asunto di e 25 barconan cu a cancela nan viahe pa Aruba.

Segun Croes, e ta considera Ministro Briesen como un bon tersio pero loke el a refleha na television ta muestra un falta di experiencia y conocimiento di desaroyo di crusero na Aruba.

Croes a señala cu Travel Magazine, un revista mundialmente reconoci, a publica un encuesta teni na Mei 1989, caminda Aruba a sali na promer lugar como destinacion di crusero.

Croes a sigui bisa cu na '86 Aruba a ricibi bishita di 97

crusero, na '87 e tabata 131 y na '88 mas o menos 148.

Esaki ta danki na e mancho agresivo di Gabinete Eman caminda tabata propaganda Aruba. Gabinete Eman segun Croes, tabata bishita e conferencianan cu mester a worde bishita y tabata tin e contactonan necesario cu tabata vital pa haci Aruba un base di actividadnan crusero.

Croes a señala cu di Mei '89 pa awor, algo a socede cu Aruba a perde 25 bishita di crusero. Croes a enfatisa cu e nota bisa 25 bishita di diferente crusero manera Ministro Briesen a enfatisa.

Esaki ta significa cu 25 biaha APA ta perde placa y Aruba ta perde mas o menos 25 Mil turista cu lo a contribui cu nos comercio. Awor e cruseronan

ta bay Curaçao.

Segun Croes, pa AVP no tin duda cu esaki ta debi na e expresionnan di Ministro Nicolaas.

Croes a enfatisa cu e declaracion di Ministro Briesen na television a lage preocupa pasobra e ta muestra cu tin problema den e mancho di turismo na Aruba.

Segun Croes, esaki ta debi na e hecho cu e Gobierno actual falta di vision, agresividad. Ya no ta ricibiendo e cifranan tur luna manera tabata e caso cu Gabinete Eman.

Croes a señala cu e promocion na Hulanda a bay malo y te ainda no sa kico lo bay haci pa mehora e situacion.

AVP ta hopi preocupa ariba e situacion aki pasobra si ta asina ta mancha turismo mester tene man na curason.